

35 pemenang BIBD Aspirasi 2 bawa pulang BND1,000



KETUA Jualan, Kumpulan Perbankan Runcit, Bank Islam Brunei Darussalam (BIBD), Dayang Hajah Rohani binti Salleh menyempurnakan penyampaian hadiah kepada salah seorang pemenang (kanan). Manakala gambar atas, beliau bergambar ramai bersama sebahagian pemenang cabutan bulanan ke-10 bagi Kempen Ganjaran BIBD Aspirasi 2.

KIULAP, Jumaat, 25 September. - Bank Islam Brunei Darussalam (BIBD) baru-baru ini menyerahkan sejumlah BND35,000 kepada seramai 35 pemenang cabutan bulanan ke-10 dalam Kempen Ganjaran BIBD Aspirasi 2.

Setakat ini, untuk Kempen BIBD Aspirasi 2 yang dilancarkan pada bulan November 2019 yang lalu, BIBD menyerahkan sejumlah BND465,000 hadiah kemenangan kepada seramai 330 pemenang, termasuk pelanggan yang dibawa daripada Kempen BIBD Aspirasi 1.

Cabutan terbaharu kempen berkenaan menyaksikan pemenang bulanan membawa pulang sejumlah BND1,000 setiap seorang bagi bulan September,

yang juga sebagai penghargaan di atas kesabaran mereka mengikuti program simpanan tersebut.

Sehubungan dengan itu, satu majlis penyampaian hadiah diadakan di Cawangan BIBD Kiulap, di mana hadiah-hadiah disampaikan oleh Ketua Jualan, Kumpulan Perbankan Runcit, BIBD, Dayang Hajah Rohani binti Salleh.

Di samping kemenangan bulanan, pelanggan juga berpeluang memenangi hadiah saku tahunan sebanyak BND25,000 dan juga hadiah utama yang mampu mengubah kehidupan mereka dengan membawa pulang wang kemenangan sebanyak BND250,000, yang dijangka akan diadakan pada bulan Disember tahun ini.

Setakat ini, untuk Kempen BIBD Aspirasi 2 ini, BIBD memberikan sejumlah BND465,000 hadiah kepada seramai 330 pemenang, termasuk pelanggan yang dibawa dari Kempen BIBD Aspirasi 2 sebelum ini.

Untuk melayakkan diri bagi cabutan hadiah utama, pelanggan hendaklah melanggan BIBD Aspirasi 2 sekurang-kurangnya 90 hari sebelum cabutan.

Tarikh terakhir melayakkan diri bagi mendapatkan hadiah dalam kempen ini adalah pada bulan Ogos 2020, tetapi BIBD berkeinginan meneruskan kempen ganjaran tersebut, di mana pelanggannya digalakkan untuk menyimpan simpanan mereka di BIBD Aspirasi agar layak mendapat cabutan hadiah dalam



Siaran Akhbar dan Foto : Bank Islam Brunei Darussalam

edisi BIBD Aspirasi seterusnya, iaitu BIBD Aspirasi 3.

Penyimpan daripada kempen sebelumnya yang membuat simpanan mereka dalam Kempen Aspirasi BIBD semasa akan dibawa secara automatik ke Aspirasi BIBD 3. Cabutan seterusnya bagi pemenang bulanan akan diadakan pada bulan Oktober.

Dengan sokongan pelanggan bank dan masyarakat Brunei secara amnya, program ini terus

berjaya dan bermanfaat. Ini mencerminkan bahawa pelanggan program ini memahami kepentingannya dan memberi manfaat dari segi kewangan dan membantu masyarakat Brunei menanamkan budaya menabung.

BIBD pada masa yang sama, berasa gembira dapat memulakan program yang menyokong agenda kebangsaan untuk mewujudkan masyarakat yang celik kewangan di Negara Brunei Darussalam.

UNISSA terus usaha memartabatkan bahasa Arab

Oleh : Wan Mohamad Sahran Wan Ahmadi
Foto : Ihsan Profesor Madya Dr. Siti Sara Haji Ahmad

BANDAR SERI BEGAWAN, Rabu, 23 September. - Universiti Islam Sultan Sharif Ali (UNISSA) menerusi Fakulti Bahasa Arab sentiasa berusaha bagi memartabatkan bahasa Arab melalui inisiatif-inisiatif yang antaranya menawarkan program Sarjana Muda, Sarjana dan Ph.D Bahasa Arab dan penawaran bahasa Arab untuk orang ramai.

Selain itu, inisiatif UNISSA termasuk penubuhan International Arabic Learning Testing System (IALTS) menawarkan kursus peningkatan bahasa Arab (Asas, Pertengahan dan Lanjutan) dan menubuhkan Badan Pelajar Fakulti Bahasa Arab dan Kelab Bahasa Arab.

Penolong Rektor (Akademik) dan Dekan Fakulti Bahasa Arab (FBA) UNISSA, Profesor Madya Dr. Siti Sara binti Haji Ahmad semasa ditemu bual menjelaskan mengenai aktiviti-aktiviti yang dianjurkan, iaitu Karnival Bahasa Arab, Festival Bahasa Arab, Eksplorasi Bahasa Arab, Perkhemahan Serantau Bahasa Arab, Mobiliti Akademik ke IPT Luar Negara, Pertandingan Debat Bahasa Arab Antarabangsa / Kebangsaan dan sebagainya.

Beliau seterusnya berkata, di mana UNISSA juga menubuhkan Instagram Fakulti Bahasa Arab dan mengaktifkan program Al-Arabiyyah-Minna Wa Ilaikum (Dari Kami Untuk Kamu).

"Selain penerbitan buku cerita sejarah dalam bahasa Arab, beberapa projek telah dirancang, seperti projek baharu, iaitu penterjemahan sebanyak dua buah buku cerita bergambar bersama Pusat Sejarah Brunei. Perancangan juga termasuk penerbitan buku bacaan bahasa Arab berserta latihan yang disasarkan kepada



PENOLONG Rektor (Akademik) dan Dekan Fakulti Bahasa Arab (FBA) UNISSA, Profesor Madya Dr. Siti Sara binti Haji Ahmad semasa ditemu bual.

sekolah-sekolah Arab dan juga sekolah-sekolah yang mengajar mata pelajaran Arab," ujarnya.

Hasil buku-buku cerita ini tambahnya, ada digunakan dalam aktiviti-aktiviti pertandingan membaca dan lakonan serta mempergiatkan lagi aktiviti-aktiviti yang disebutkan di atas.

Beliau juga berharap agar hasrat supaya bahasa Arab itu menjadi bahasa ilmu, khususnya penuntut aliran Arab dan para pelajar perlu menanamkan niat untuk sentiasa memperbaiki bahasa Arab mereka kerana mempelajarinya adalah satu ibadah atas kapasiti bahasa Arab sebagai bahasa Al-Quran, bahasa ibadat, bahasa ilmu dan bahasa tamadun.

"Praktikkan bahasa Arab sesama guru, sesama rakan dan bahkan gunakan teknologi untuk melazimkan diri mempraktikkan bahasa Arab tidak kira masa atau tempat serta jangan malu untuk mencuba dan belajar daripada kesilapan bahasa," jelasnya lagi.

Garage Sale bermula 2 Oktober



Oleh : Dk. Siti Redzaimi Pg. Haji Ahmad
Infografik : Ihsan SMARTER Brunei

BANDAR SERI BEGAWAN, Rabu, 23 September. - SMARTER Brunei akan mengadakan Garage Sale atau Jualan Amal yang merupakan aktiviti tahunan persatuan berkenaan yang bakal berlangsung selama tiga hari bermula 2 hingga 4 Oktober 2020.

Acara akan mengambil tempat di SMARTER Baca G.I.F.T

Centre, Jalan Sungai Hanching, dengan menjual barangan terpakai, seperti permainan dan pakaian kanak-kanak, barangan perhiasan, beg, kasut, barangan rumah, makanan serta minuman dan banyak lagi dengan harga yang murah, di mana hasil jualan tersebut akan disumbangkan ke SMARTER Brunei.

Penyertaan dibukakan kepada

orang ramai yang ingin menyumbangkan barangan terpakai dengan harapan mampu mengurangkan pembaziran dan pencemaran.

Bagi mereka yang membeli barangan terpakai pula, memang bukan satu rahsia lagi kerana kita boleh mendapatkan barangan yang diinginkan dengan harga terendah.

Hasil jualan akan disumbangkan sepenuhnya kepada Persatuan SMARTER Brunei dan dengan ini, orang ramai melakukan sesuatu untuk membantu komuniti yang memerlukan, sekali gus dapat memberi kesedaran kepada masyarakat mengenai autisme.

Untuk keterangan lebih lanjut, hubungi talian SMARTER Brunei di +673 7172991 atau ikuti Instagram mereka di @smarterbrunei.

Persatuan SMARTER Brunei ditubuhkan pada 9 September 2001, merupakan pertubuhan kerajaan yang komited dalam menyediakan perkhidmatan kepada individu serta ahli keluarga yang menghidap Autisme.

Ketika ini, persatuan tersebut mempunyai tiga buah pusat pembelajaran / pemedulian dengan 100 pelajar yang mengalami autisme, iaitu Pusat SMARTER Autisme EDGE yang terletak di Kampung Mata-Mata, Gadong dan Cawangan Kuala Belait serta Pusat Autisme Brunei bagi Orang Dewasa (BACA), terletak di Jalan Sungai Hanching.